

" Has donau boxi "

Nascia

a s'umbra 'e su nuraxi  
has donau boxi,  
lingua stimada,  
a cantus de pastoris,  
a muttettus de messajus  
in oras de pasiu e de fatiga.

Has donau boxi

a cantadas a trivas  
in nottis de incantu  
di 'esperu de festa.

Has donau boxi

a attitudus de mammas  
sderriadas de suncuna  
de su fillu stimau,  
a contus de forredda  
i a anninnias appaxiadoras  
a pipius scinizzosus.

Has donau boxi

a chescias po fillus malus  
chi t'hant arrefudau  
accogaus de lusingas furisteras.

Has donau boxi

a 'erchidus de frastimu  
contra 'e is meris scraxudus  
e is istrangius bardaneris  
in terra tirriada.

Has donau boxi

a is primus mius fueddus nocentis,  
a is sentidus prus bellus  
chi benant sinzillus  
de is intragnas de su coru

( fillu bonu )